



KEMENTERIAN PERTANIAN DAN INDUSTRI MAKANAN
Ministry of Agriculture and Food Industries

Wisma Tani

No 28, Persiaran Perdana, Presint 4

Pusat Pentadbiran Kerajaan Persekutuan

62624 PUTRAJAYA,

MALAYSIA

No. Telefon : 03-8000 8000

No. Faks : 03-8888 6020

Laman Web : www.mafi.gov.my

KENYATAAN MEDIA

SEKTOR PERTANIAN DI KAWASAN PKPD CAMERON HIGHLANDS DIBENARKAN BEROPERASI

PUTRAJAYA, 16 JUN 2021 -- Mesyuarat Jemaah Menteri pada hari ini bersetuju membenarkan sektor pertanian serta rantaianya terus beroperasi sepanjang masa termasuk di mana-mana kawasan yang dilaksanakan Perintah Kawalan Pergerakan Diperketatkan (PKPD).

Ini adalah selaras dengan keputusan Kerajaan meletakkan sektor pertanian, perikanan dan penternakan serta rantaianya sebagai satu perkhidmatan perlu (*essential services*) yang dibolehkan beroperasi sepanjang masa tertakluk kepada Prosedur Operasi Standard (SOP) tertentu yang ditetapkan oleh Majlis Keselamatan Negara (MKN).

Sidang Mesyuarat Khas MKN: Pengurusan COVID-19, Bilangan 38 Tahun 2021 pada 14 Jun 2021 juga telah bersetuju supaya sektor pertanian di seluruh negara termasuk kawasan PKPD dibenarkan untuk terus beroperasi. Keputusan tersebut turut merangkumi sektor florikultur dan bunga hiasan yang juga dibenarkan beroperasi seperti mana sektor-sektor pertanian yang lain.

Keputusan ini juga telah dimaklumkan kepada Polis Diraja Malaysia (PDRM) dan pihak penguatkuasa lain supaya membenarkan pergerakan keluar masuk lori-lori yang mengangkut hasil pertanian termasuk sayur-sayuran dan buah-buahan dari kawasan PKPD bagi membolehkan penghantaran dari ladang-ladang dapat diteruskan dari Cameron Highlands. Ini adalah penting bagi memastikan rantai bekalan makanan negara tidak terganggu dalam apa jua keadaan.

Kementerian Pertanian dan Industri Makanan (MAFI) akan memastikan semua rangkaian dan rantai dalam aktiviti sektor pertanian dan industri makanan tidak akan terjejas sepanjang pelaksanaan PKP termasuk PKPD di beberapa kawasan tertentu demi kelangsungan rantai bekalan makanan dan jaminan sekuriti makanan negara.

Masalah diperingkat pemasaran dan penghantaran sayur ke pasar tergendala susulan pelaksanaan PKPD di beberapa kawasan di Cameron Highlands bermula 14 Jun 2021 hingga 27 Jun 2021. Ini termasuk Kampung Raja yang meliputi dari Kampung Sungai Ikan hingga ke Kampung Blue Valley di mana kawasan tersebut merupakan kawasan pertanian yang melibatkan keluasan 1,500 ekar.

Pelaksanaan PKPD di Kampung Raja telah menyebabkan pengusaha-pengusaha sayur yang menetap di kawasan tersebut tidak dapat melakukan aktiviti di setiap rantai aktiviti pertanian meliputi kawasan lojing dan juga kawasan sekitar Kampung Raja, Kampung Blue Valley dan Kampung Sungai Ikan.

Ini menyebabkan hasil pertanian sebanyak 500 metrik tan tidak dapat diedar keluar ke pasaran memandangkan pekerja-pekerja yang berada di kawasan tersebut tidak boleh bergerak keluar ke ladang-ladang dan lori-lori yang mengangkut hasil pertanian turut tidak dapat keluar dari kawasan PKPD.

Dianggarkan seramai 500 orang petani sayur dan 80 orang petani bunga menjalankan aktiviti pertanian di kawasan ini yang menghasilkan 560 metrik tan produk setiap hari iaitu sebanyak 180 metrik tan (32%) dari Kampung Raja, Kampung Blue Valley dan sebanyak 380 metrik tan (68%) dari Lojing.

Sektor pertanian juga akan terus dibenarkan beroperasi dalam Fasa 2, Fasa 3 dan Fasa 4 Pelan Pemulihan Negara, selaras dengan persiapan untuk negara keluar daripada pandemik COVID-19.

Diharapkan dengan keputusan Kerajaan dalam hal ini dapat meredakan isu pergerakan bekalan sayur-sayuran selain turut melegakan para petani dan pemain industri sektor pertanian di kawasan yang terlibat dengan PKPD khususnya Cameron Highlands.

Sehingga 15 Jun 2021, MAFI melalui Jabatan dan Agensi dibawahnya telah mengeluarkan sebanyak 1,456 surat kebenaran keterlibatan dalam sektor pertanian tidak formal (informal) termasuk aktiviti rantai pembekalan dan pemasaran berkaitan keperluan makanan di Cameron Highlands.

MAFI akan meneruskan usaha untuk memastikan bekalan makanan negara kekal stabil dan mencukupi dalam apa jua keadaan, terutamanya di kala negara masih mengharungi penularan pandemik COVID-19.

YB DATUK SERI DR RONALD KIANDEE
MENTERI PERTANIAN DAN INDUSTRI MAKANAN
16 JUN 2021